

**REGIONAL NEWS BULLETIN
HEADLINES (EVENING)**

Date – 29/12/2024

Time - 18:30 Hrs

1. Larsap chhuak tur Dr Hari Babu Kambhampati chu naktuk hian Raj Bhavan Durbar hall-ah thlah a ni dawn.
2. Hunpui vuakveta sorkarin halpuah leh halmawi a khapna-ah YMA leh Police tangkawpin mipuite hnena ngenna leh hriattirna kawng hrang hrangin a kalpui mek.
3. Prime Minister Narendra Modi-a'n Danpui chu ram hruaitu eng a ni, a ti.
4. South Korea-a mi 181 phur thlawhna chesualah mi 179 an thi.

<><><>

GOVERNOR

Larsap kal chhuak tur Dr Hari Babu Kambhampati chu naktuk hian Raj Bhavan Durbar hall-ah thlah a ni dawn. Raj Bhavan atanga thu dawn danin larsap kal chhuak tur hi naktuk chawhnu dar 3 hian Durbar hall-ah Raj Bhavan a thawk official-te'n an thlah ang a. Sorkar anga thlahna hun erawh chu Aizawl a chhuahsan ni, kum thar January ni 2 khian buatsaih a ni ang a. January ni 3 khian Odhisa khawpui Bhubaneswar Raj Bhavan-ah thutiamtir a he state larsap ni tura lakluh tura ruahman a ni. Mizoram larsap thar tura ruat General Vijay Kumar Singh lo chhoh hun tur leh thutiam a rawn lak hun tur hi a la chiang lova. Naktuk lamah chuan a chian theih tawh beisei a ni . Naktuk hian Chief Secretary Pu Khilli Ram Meena hovin official pawimawhte'n larsap kalchhuak tur, official-a thlah dan tur leh a thar, thutiamtira lakluh dan tur hi an sawiho dawn ni a thudawn a ni.

Puan tawh thin angin Odhisa larsap Raghubar Das banna President Droupadi Murmu-i'n a pawm tak avangin Thawhlejni kal ta tlai lamah khan state thenkhat a larsapte awmna siksawi a ni a. Mizoram larsap thar atana ruat General Vijay Kumar Singh hi India ram sipai lal ber (Chief of Army Staff) 24-na a ni a, Indian Army atanga a chawlh hnuah Politics-ah a lut a, kum 2014 leh 2019 Lok Sabha Inthlanpuiah khan BJP ticket-a dingin Ghaziabad, Uttar Pradesh atanga thlan tlin a ni . Prime Minister Pu Narendra Modi kaihhruai term khatnaah khan Minister of State for External Affairs, Minister of State (Independent Charge) for DoNER leh Minister of State for Statistics and Programme Implementation-te a chelh a. A term hnihnaah khan Minister of State for Road Transport and Highways leh Civil Aviation-te a lo chelh tawh bawk ani.

<><><>

LAST SUNDAY

Kumin, 2024 a Pathianni hnunngung ber vawiin kha Presbyterian kohhran leh kohhran dang thenkhat chuan Sande Sikul kai tha lawmman sem ni atan an hmang.

Pathianni chawhma Sande Sikul kai kim bakah, vawi khat emaw vawi hnih emaw kai lo tan lawmman pahnihna leh pathumna sem a ni. Presbyterian Kohhran chuan kum 10 chhung a zawna Sande Sikul kaikim hnenah Pi Zaii Medal an hlan thin a, kum 15 chhung a zawna kaikim tan Pi Zaii Medal Special hlan ani bawk. Mizoram Baptist kohhran pawhin vawiin khan tualchhung Kohhran hrang hrangah Inkhawmnin kohhran thenkhat chuan Upa thlang in Sunday sikul lawmman sem an awm bawk. Kolasib-ah pawh vawiin chawhma Sunday School inkhawm ah Kohhran tam ber chuan sande sikul kaitha lawmman sem in, kumina zirlai pumpui khaikhawmna hun hman a ni bawk a, Serchhip-ah pawh Presbyterian Kohhran chuan kumin chhunga puitling leh naupang lam sande sikul a kai thate lawmman semna hun an hmang ani.

<><><>

FIREWORKS

Sorkarin hunpui vuakveta halpuah leh halmawi a khapna kawngah YMA leh Police tangkawpin mipui hnena ngenna leh hriattirna kawng hrang hrangin a kalpui mek.

Aizawl District hnuaiia police station hrang hrangte chuan khapna thupek hi bawhzuiin theihtawp chhuahin halpuah leh halmawi zuar leh kawldap hna an thawk mek a. Dawr, kudam leh lirthei hrang hrangte, transport leh courier service te endik an nih bakah online a zuar thinte pawh theih ang anga chhui zui an ni bawk. Aizawl Police-te chuan sorkarin khapna thupek a chhuahte zawm theuh turin mipui an ngen a,

halpuaah leh halmawi hal chu mihring hriselna atan a that loh mai bakah ranvulh te'n an thihpui thin avangin thupek te zawm a, Police in thupek an kenkawh kawngah thawhpui turin a sawm a ni.

Central YMA pawhin sorkar phalloh thil halpuaah leh halmawi te hal lo tur leh zuar lo turin mitin a ngen a ni. Branch YMA hrang hrangte mahni huamchhung theuhvah theihtawpa tanla turin a ngen a. Veng tinah pawh aurinna leh banner hmangte inhriattirna hi tih chhuah a nih bakah social media lamah pawh halpuaah leh halmawi tel lova kumthar hmang tura ngenna te siam a ni bawk.

<><><>

LUNGLEI AQI

Lungleia Mizoram Pollution Control Board air quality Monitoring station data atanga a lan danin Lunglei boruak a la thianghlim thawkhat.

Lunglei boruak hi a thianghlim zawng tehna-ah ram pum huap dinhmunmicrograms per cubic meter 60 hnuaiyah a la awm a, kum thum kalta data atanga a lan danin Lunglei Air quality hi a la pangngai viau a, a san lai berin kumin February thlaah micrograms per cubic meter 38 a ni a. Kum dang zawngah chuan micrograms per cubic meter 35 hnuaiyah vek a la awm a, chutih rualin chhiat lam a pan ve hret hret a ni. Thal lai leh lo hal laiin boruak a bawlhhlawh zual a, kuminah pawh January atanga May thla thleng khan a sang ve hle a, hlauhawm lutuk chin erawh a thleng lova, june thla atang erawh chuan a tlahniam ve leh deuh ani. Krismas leh Kum thar vuak vet pawh boruak a bawlhhlawh em em lo a, amaherawhchu, kum hlui thlah zan zanlai halpuaah hal hunlai bik te-ah chuan a sang ve hle thin a ni.

<><><>

BEGGAR

Khawtlang tana thawktu, Ruatfela Nu ti a hriat lar Pi Vanramchhuangi chuan tun hnai a an buaipui Aizawla Chakma nupa kutdawhte chungchang chu tun kar chho hian a buaipui zui dawn thu a sawi.

Assam Rifles biakin bula kutdawh a thu thin Chakma nu pakhat chu Krismas hma khan Pi Vanramchhuangi te hian an lo buaipui tawh a. Mi tlahlangte enkawlina hmun Aizawl Tlangnuam venga Shakti Sadan hmunah an dah a. Natna benvawn leh inkaichhawn theih a vei avang leh tharum thawh zawnga chet a chin avangin Shakti Sadan thuneitute an buai hle a. Kut dawh ve tho a pasalin a ngenna angin chhuah a ni ta a. Hetah hian Aizawl khawpui a kut dawh lo tur leh an khua a haw tura intiamna an ziah hnan vek hnu-ah Department of Women & Child Development (WCD) thuneitute remtihna-in an inhruai chhuak a. Mahse, tun hnai-ah Aizawl khawpui-ah bawk kut an dawh leh tih hriat a ni a. Pi Vanramchhuangi chuan a tul angin dan hmanga thil kalpui zui a tum thu a sawi.

Chakma nupa hi hun engemaw chen Aizawl khawpui-ah kudawhin an awm tawh a. A nupui zawk hi dam lo leh chak loh hmel tak a nih avangin Pi Vanramchhuangi te hian tute'n emaw kut an dawh luihtir a nih an ringhlel a. Rangvamuual atanga phur chhova tlai lama phur hawleh thin taxi neitute pawh an chhui thleng a, amaherawh chu, taxi khalhtute hian tihsual an neih awm hmuhchhuah a ni lo.

A pasalin a ngen nasat avang hian Shakti Sadan atang hian chhuahtir a ni a. Mahse, an thutiam bawhchhia-in Aizawlah kut an dawh leh ta tih hria-in bawhzui an tum a. Hnamdang kutdawh an tam tak em avangin kutdawh khapna dan siam a tul thu, sorkarah pawh an thlen tawh niin Pi Vanramchhuangi chuan a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

MANN KI BAAT

Prime Minister Narendra Modi-a'n Danpui chu ram hruaitu eng anih thu sawiin kumthar Jan ni 26-a India ram Danpuiin kum 75 a tling tur chu a lawmawm tak zet a ni, a ti.

Vawiin Akashvani-a Mann Ki Baat hun a hmanna-ah he thu hi sawiin Danpui chuan harsatna leh beihna hrang hrang a paltlang tawh, a ti a, kumin Constitution Day pualin kum tluan daih tur prog. chi hrang hrang buatsaih anih thu leh khua leh tui-ten ram Danpui chungchang an hriat chian theihna turin website pakhat constitution75.com

siam a nih thu sawiin he website-ah a duh apjang tan Danpui Preamble chhiar lai video, dah theih a ni, a ti a, ram Danpui chu tawng chi hrang hranga dah anih thu leh zawhna neite tan pawh zawh theih a ni, a ti bawk.

<><><>

SOUTH KOREA PLANE CRASH

South Korea-a tukina mi 181 phur thlawhna chesualah mi 179 an thi a, mi 2 dama chhanchhuah an ni. Khualzin 175 leh hnathawktu 6 phur, Jeju Air thlawhna hi Bangkok atanga chhuak a ni a, Seoul khawpui chhim lam, Muan International Airport-a tum dawnah a chesual a ni. South Korea fire agency sawi danin, thlawhna chhunga hnathawktu 6 zinga 2 chu dama hmuh an ni a, tun thlengin ruang 22 chu tute nge an nih hriat a ni tawh a ni.

<><><>